



Editorial

Hrosôh pakheipazy ta Zu chyhsa Babelaw sei ta a tâhpazy hnohta bie ama chhopa cha seichâna tawhta thlai pua bâ awpa ta a daihti lei kawpa ta ama reipa vâta sei a tâhpazy cha ama khihsa a pachyu khao leipa eita ama khihsana tha ta a riari haw. Chavâta Khazohpa ta hrosopa Jeremiah hnohta sei a tâhpazy hnohta biehmeiseihpa chho awpa ta a tuah. Cha bie cha, “Ozy sa u la, sadôzy tao u la, a theizy nie u la. Lapinôzy hnei u la, sawchapawpazy nata sawchanôzy sa u la, nama sawchapawpazy châta lapinô la u la, nama sawchanôzy vahpa pahneisa u la, sawchanô sawchapaw ama sa theina hâhta.” (Zer. 29:5-6). Chahawh tlai ta, Theslawnika awnanopa liata pachutuhpa thokhazy ta mopathaihpâ lana daihti â hnia hawpa vâta lyuzy tao hmâ khao aw mapi tahpa palôhru riarina bie ama reipa vâta ngiapâtuhpâ thokhazy raihria hoh khao leipa ei ta, thathi kawpa ta y ei ta, niepa hnei khao veih ei. Chavâta Lyuchâ Pawla ta Thesalawnika awnanopazy hnohta a reipa bie cha, “Nama hnohta ei y no chhao khata he bie he eima cha piepa kha,; ahyrai ta rai a hria khoh vei khiah tala, a nie chhao nie kha ei se tahpa hi. Nama hry ta thokha thathipa ta ama y tahpa thâtih pahno tloh pita, chazy cha raihria hra leipa eita tlo ama nie chakhyh tyh.” (2Thes 3:11-12).

Babelaw seichâna liata a ypazy nata Thesalawnika awnanopazy cha thâtih do leipa ta ama hrona cha pariarisa ta raihria khao leipa ta vaw y haw eita, ama khihsanazy rao ta niedo chhao vaw hnei khao veih ei. Chavâta lyuzy ozy sadôzy tao ta ama ku raihria tlai ta pati nie awpa ta pasyupa ama cha. Cha hawhta Myanmar râh chhao sawhkhâ riarina vâta zawpi palôh patypamâ ta ama palôhzy pariarisapa ta sailuahna phapa chhao hnei thai khao leipa ta hnabeidy kawpa ta eima y

hôn. He hawhpa sawhkhâ riarina daihti liata Khazohpa ta maniah ngiachhie ta Nochhi Mara râh liata adyuhnazy,

patupakhinazy, thisaih palonazy y mâh vei. A vaw y khao hra lei awpa ta Khazohpa liata a ngiapâ pita thlah eima chhâ hra. Cha hawhta Khazohpa ta ngia maniah a chhie ngâ nota keimo zawpizy ta eima palôhzy a pariarisapa ta a râpaih awpazy dei

palôh liata khôsao ta o nata lyu a pachyu hri awpa palôh liata eima khô khao vei khiah eima khisana a rao khai bâ aw.

Athaipazy ta Myanmar sawhkhâ riarina daihti liata rietheina miathôn chyhsa to nata chhônkhâ to liata a tlô nga haipa zy cha adyuhna vâta rairuna, Covid-19 hriiah vâta rairuna nata ati-avyna rairuna zy a châ ama tah. Eima râh liata Covid-19 tlyma, adyuhna tlyma chatlu po ta rairuna miah pie mâh vei. Khisana rairuna (ati-avyna rairuna) deikua chhôn to maniah a su haw. Adyuhna liata a boh thei nawpa ta tlôkhaohzy, arâ nawpazy a patôhpatia pita, Covid-19 tawhta a boh thei nawpa ta tha ta avaina eima tao tyh. Ati-avyna rairuna tawhta eima boh thei nawpa ta a patôpatia deikua eima phahla ngâsâ. He patôpatiana phapa he hnei a chhuah sila, lyu vâ awpazy, sadô tao awpazy hnoh a sy leipa ta, tao hualua suh vy. Khazohpa ta eima ku raihriazy nie awpa a pasaih khiah nie aw pita, a pasaih vei khiah Khazohpa rei sai ta a châ aw.

.....

Awnanopa Nôpawzy Khitlyna

1. G/S nata Tresurer zy he Synod. I lâta Awnanopa zy tly awpa ta Oct. 30, 2021 nohta Hqrs., Lailiapi tawhta Patheitlâ lâta a thaopa châ ta, Nov. 1, 2021 nohta Aly kawpa ta

Hqrs., Lailiapi su ama vaw tlô pakhua haw. Ama khitlyna liata ama Lâthlôhzy palâ kawpa ta Awnanopa chhaota Aly kaw ngaita eita ABeipa rônahna tha ta to hmeiseihpa achâ.

2. Rev. Dr. Zôdau cha Nov. 1, 2021 noh ta Heimata lâta khitly ta Theological Seminar kyh nata azaopa ta khitlyna a hnei. Cha tawhta Para nata Mala zy lâta Mararâh niedo a pazaona lâthlôh monitoring hnei ta, Nov. 3, 2021 noh ta Office vaw tlô pakhua heih awpa ta Thlachhâna achâ.

.....

Mission Section

1. EMM Office nata Mission Field hriatuh zydua ABeipa ngiachhiena vâta Oct. 29, 2021 nohta September. 2021 taihta Hlao pie khai theipa a châ.
2. Mission râh lâ liata atahmâ taihta la chariah adyuhna y leipa thâtih pha khai ta, hriatuh zy chhaota ABeipa ngiachhiena vâta hnatlâ ama pha khai tahpa thâtih daopa achâ.
3. Nov. 8, 2021 nohta Mission Field Secretary zydua EMM Office tlôpaki khaipa ta Nov. 9, 2021 nohta Mission Field Raihria Akaona Meeting hnei awpa ta a châ tahpa thâtih eima daoh.
4. Laymo Mission Field nata Laytu Mission liata sâh kôvei apha ngaita tahpa thâtih eima daoh. Asho Mission Field liata Awnanopazy cha atanoh ama yna khi lâta tlô thei mah leipa ta, An Refugee Centre liata ama y chypa a châ. Myo nata Khami Mission Field liata Refugee zy he ama yna khih lâta kua bâ awpa nata kua mah lei awpa liata noraihna tha ta hnei eita, achâ la, Refugee Centre a mohôtuh viapa INGOs zy he atahmâ ta Sawhkhâ a riarina liata a ôpa Myanmar Râh chhôn via lâta Refugee zy he baokhâ angiah viapa ta pachâ a ypa vâta Rakhine Refugee he bâ hnôhchhy chy via awpa ta pachâna a châ. Chavâta eima Mission Field liata Awnanopa sahlao zy atyudua kyh liata tha ta no a lalaona ama hneipa vâta ama chô liata ABeipa ta lâthlôh pha via a chhi thei n'awpa ta Awnanopa zydua ta Mission châta thlachhâkhei chyuh suh vy.

.....

KNP Section

1. Hawti Nay Lin Aung, Paw U Lin Naing, Nô Daw Nan Sein (thinoh Oct. 2, 2021) Layhla Village, Paletwa Township (Paletwa refugee camp liata ypa) cha, anô pahâhsaina vâta Lialaipei KHD o vaw tlô kheih awpa ta khona y taraw ta Covid- 19 hriiah nata eima râh riarinazy vâta vaw tlô kheih awpa ta rairuna a ypa vâta , MEC KNP ta thohna nata niedo a byungiahpazy châta baona Ks. 500000/- (Kyat Five Lakhs) he Oct. 17, 2021 Sunday liata Paletwa Biatuhpa nata KNPzy ta amohôtuhpa anô seihnai ku lâ hlâna ama hnei. Mohôtuhpa nata hawti châta thlachhâ bao lyma su vy.
2. KNP/KHD sôh apangia mah leipazy KNP CC hlâta Office lâ nama pangia khai bei awpa ta a hawpa nama châ.

.....

KHP Section

1. KHP pachuna Châbu (Bible Quiz) mâ apaphao mahleipa local thôkhazy lâta Chabu mâ kha December thla chhâ hlâta nama vaw paphao khai bâ awpa ta eima cha pahnosâ.
2. KHP Sunday (December 5) noh liata local to KHP sahlao zydua aly kawpa ta nama hmâ thei nawpa ta nama local ryhpaona chyuh hawhta program pha kawpazy vaw tao chyuh muh vy. Potlâna hriiah hryta a châ vâta yzie thai kawpa ta nama vaw hmâ chyuh bei awpa ta ahawpa nata pahnosapa nama châ.
3. KHP CC & Election ei (14)na châta local to tawhta nama agenda phapa zydua cha December thla chhôn ta KHP Secretary hnohta nama vaw paphao khai bei awpa ta a hawpa nama châ. Local KHP Seal chhao ta siano kawpa ta nama vaw roh khai bei awpa ta eima cha haw.

.....

Calvary Clinic Update

1. Eima Awnanopa ta paduapa Calvary Clinic he Lialaipei. A, KHD House su liata pahypa châ ta, chielei/tlâleipazy châta thohna zy chalei theipa a châ. Km. Khaitha (09765462849) azaona hneipa ta chalei awpa a châ aw.

2. Oct. 23, 2021 noh ta Matupi Bia chhôn liata MEC pastorzy nata Office liata hriatuhpa thokhazy Covid-19 Vaccine einona taopa a châ.
3. Khizaw potlana achâpa Covid-19 hriiah he Mara râh khito ta taotheina chyu hawhta avaina taopa achâna liata Lialaipi, Sabyhpi, Sabyh, Lelai, Patheitla, Para zy liata Covid-19 Testing taopa châ ta a ry lâta hawhta thâtih palâsapa a châ.

No	Test-na Su	Test Maluh	(-)	(+)
1	Lialaipi	62	60	2
2	Sabyhpi	1	1	-
3	Sabyh	43	42	1
4	Lelai			
5	Patheitlâ	16	16	-
6	Para	14	14	-
		136	133	3

(**Remark;** Lialaipi liata Positive he Q. Centre liata hmôpa châ ta, mo pakha he Negative haw tahpa thâtih daopa achâ. Sabyh liata Positive chhao he H. Quarantine sopa châ ta Negative haw tahpa thâtih daohpa achâ hra. Lelai dei he thâtih adaoh thei mah pi)

.....

ABeipa ta Sâhria Kôvei Byhnâ pha mania pie

2021 kô he ABeipa ta Marapa nata Awnanopa Byhna rônah ngaitapa mania pachhuapanohpa ta Tlâh lyuna ahneipazy Kôvei a pha ngaita. ABeipa liata Alyna bie eima rei hmeiseih. Anodeikua la, lyu atao chyh eita lyu taopa tlakaipa chhaota lyu pakawh vei hra ei sala Kôvei pha kawpa Byhna rônahpa maniah apieta vâta ABeipa Moh cha chhâzaw ta reithaipa y maw sy.

Rev. Phuhe cha Heimata Bia a vaw tlô

Rev. Phuhe he ABeipa chhitha phana vata Hong Kong tawhta M.Th vaw patlô haw ta, Oct. 28, 2021 ta Assembly ta Biatuh raopa su Heimata liata ABeipa rai chakao awpa ta aly kaw ta a vaw tlô haw. Heimata Awnanopa chhaota tha ta a ly kaw eita, ABeipa Moh chhao tha ta ama reithai hmeiseih.

Ahawna nata Thâtih Pahnosana

- ❖ MEC Calendar. 2021 liata HNA noh he Nov. 1 tahpa ta ro thlamawpa châ ta, cha noh he

HNA noh châ leipa ta Nov.7 he HNA Sunday ta hmâ awpa ta a châ tahpa ahawna nata thâtih eima cha pahno sa.

- ❖ Dec. 2, 2021 nohta Awnanopa ta a rao hawpa Theological Seminar he Covid-19 Potlana nata Myanmar Sawhkhâ riarina vâta chalisa chypa achâ. Awnanopa he ABeipa ta mania vaih pha via thein'awpa ta Awnanopa zydua ta ABeipa lâta Thlachhâ chyu awpa chhaota Ahawna eima cha hnei.

- ❖ Eima Mararâh Covid-19 Potlana nata Sawhkhâ a riarina vâta sievawna kyh liata tha ta daihty awpa châ pi, Niedo lana kyh liata tlyma, Hnatlâ amohôhna kyh liata tlyma rairuna atyh awpa eima châ. Chavâta cha kyh tawhta eima thlâzi thei n'awpa ta eima Khih chheipâh Motor/ Cycle lâthlôhzy he pabosapa nata pathaisa awpa he Marasaw zy ta taovyuh Sakha hawhta apyhpa ta eima Lâthlôh a pha theina nata eima tao theina chhôn ta taohria khai chyu awpa ta ABeipa Moh ahawna eima cha hnei.

- ❖ Eima Râh sawhkhâ ariarina nata Covid-19 Hriiah potlana tawhta Marasaw zy nata Arâhsaw zy eima thlâpatoh thei n'awpa ta noh tato ta Awnanopa chhônhto zydua ABeipa lâta Thlachhâna hnei parei chyu awpa ta ABeipa Moh ta pasyuna nata ahawna eima cha hnei.

.....

Hqrs., Lialaipi liata Châbu phapa chaleitheipa achâ haw

- Mara Holy Bible (Zipper) Ks. 10000/-
- Krizyhpa Hla Bu (Chyhpa) Ks. 2000/-
- Mission Noh Laichadaina Ks. 500/-
- Chicheina Bu Ks. 2000/-
- Chanôzy Thâtih Ks. 2500/-
- MEC Rule Ks. 2000/-
- Mara Dictionary Ks. 7000/-
- Bible Quiz Ks. 1000/-